

UIR ERAT IN TERRA HUIUS NOMINE IOB: et erat uir ille simplex, et rectus, ac timens Deum, et recedens a malo. Nati sunt ei septem filii, et tres filiae. Et fuit possessio eius septem millia ouium, et tria millia camelorum, quingenta quoque iuga bouum, et quingentae asinae, ac familia multa nimis: eratque uir ille magnus inter omnes orientales. Et ibant filii eius, et faciebant conuiuium per domos, unusquisque in die suo. Et mittentes uocabant tres sorores suas, ut comederent et biberent cum eis. Cumque in orbem transissent dies conuiuii, mittebat ad eos Iob, et sanctificabat illos: consurgensque diluculo, offerebat holocausta pro singulis. Dicebat enim: Ne forte peccauerint filii mei, et benedixerint Deo in cordibus suis. Sic faciebat Iob cunctis diebus.